

Bec, fajé i valenc... rua Sèn Nicolò!

La festa de Sèn Nicolò l'é la festa più spetèda dai picoi bec fascegn. Te vèlch paisc de la val chest veiat da la bërba biencia, regolà desche n piscop, l'va fora per la cèses jà la vea de Sèn Nicolò: a pe o co la carozza o con n picol musciat, con apede de picoi àgnoi o vèlch burt krampus che fèsc smachèr sia cedena via per jabas e che ge cor

dò ai bec più feruscoi.

Sèn Nicolò, enceben che l sie veiat e strach, l'à semper na parola doucia per ogne picol e magari fora da chel gran sach l tira fora ence n picol don: n sachetin con vèlch douc, dotrei pomarances, n pugn de nojeles, vèlch bombo, ai bec che va a scola no mencia mai n l'àpis o dotrei colores. No l'é de gregn


dons ma l'é chel che fèsc contenc nesc picoi bec.

Chest an, per nesc picoi letores, aon volù publichèr doi conties. Una che ne conta de Sèn Nicolò de enlouta e una che ne mena tel mond mudà d'alidanché. Rengrazion i autores de chesta bela conties e a duc i picoi fascegn ge auguron n bon Sèn Nicolò.



Sèn Nicolò ta Penia (foto archif ICL).

Sèn Nicolò enlouta



Depent a fresch de Luigi Gross.

L'era l 1946, l'an dò la fin de la vera. Gio aee 7 egn e Jan (no l'é so vero inom) l'aea n an più che gio. L stajea sun aut con sia giava, percheche sia mare, co la gran meseria che l'era, l'aea cognù jir a la foresta in Svizra per se vadagnar valch.

Gio e Jan siane semper ensema, ence ti lurieres, a past co le vace o a legna co la staja o te pra col restel. Ma soraldut ensema canche l'era ora de le combinar. Siane n muie bricogn o miec briconazi.

E dò n istà e n uton con tante madalenze, nigole scure le scomenzaa a sconer via l seren de nesc ciaves.

Ruaa prest Sèn Nicolò e mia mare e la giava de Jan le zibiaa de spes che siane stac massa catives e che a ogne boncont tel piat de Sèn Nicolò assane troà demò ciarbon. Chest per noi doi l'era na roba da nience ge pissar: orenda, tremenda.

Sèn Nicolò l'era la festa più bela,

la più grana, la festa de gran legreza. Chel mingol che se ciapaa l vegnia dal paradis e dut saea più bon, più douc, tant da far vègnir l'aga morta e se enveze ciapaane ciarbon, assane cognù spetar n auter an, dant de aer zeche de douc. Enlouta no l'era cedean, Babin e tante auter feste dal di d'anché.

Metuda cuscita noi doi sion doventé de colp più valenc. Se metaane de spes en jeneion a dir sù orazion. Dapò la sera se dijea la corona, una ju bas e una sun aut. Te mia vita no me recorde de aer dit mai tante corone, desche enlouta.

La vea de Sèn Nicolò semper mingol cruzié ognun à metù fora so piat con mingol de sal per l musciat de Sèn Nicolò e sion jic a dormir. L di dò, amò en scapin son jit a chierir Jan, l'é troà sentà sun scialin de ciasa, é capi subito da coche l tegnia i eies basc, che l'era sozedù la gran desgrazia e col ciap el me à cignà de sci.

Aesse volù cigar no! no! no l'é possibol, no l'é giust. Jan no l'é tant catif e se no auter no l'é più catif che gio, che enveze aee ciapà zeche.

Ge à volù n muie de egn per capir che Jan l'aea ciapà ciarbon demò percheche sia giava la era tant pureta che te majon e te tacuin no l'aea nia, ma proprio nia da ge dar.

Ma chi eies triscé e chel ciap bas no son più stat bon de i desmentiar. Nia à contà mie parole per cerir de l consolar e no l far pianjer.

Pech à contà ence dò che son jit a tor mie piat de Sèn Nicolò per spartir con el dut chel che aee: "un pom ros, che demò Sèn Nicolò aea, a mi e un a ti, un pomaranc a ti e un a mi, cater pic a ti e cater a mi, trei castagne cote te l'aga a mi e trei a ti, dotrei nojele per om."

Basta, chest l'era dut e no aee più nia de auter da ge dar.

Anchecondi no l'é più cuscita.

Giaf Bruno

Sèn Nicolò anchecondi

L'era i 5 de decembar. La mama la era vegnuda de retorn da scola belebon stenciada. Dò se aer tirà fora l paletò mol da neif, e aer metù via soa gran bolga piena de codejle, agenda e papieres, la ge aea dat n bos douc douc a so caro Piere. Ge endespijajea esser stata dalonc da el, e ades che la era a ciasa la speraa de se lasciar vindò le spale i problemes che ogne di la cognea se tor dant: a oute con valch so solé massa deribolent o zucon o massa spavech, a oute coi coleghes, a oute con chi papieres semper da utar, empieinir ite, ge pissar sora...

E dapò la se aea metù a enjgnar valch per da cena. Pech dò l'era ruà ence l papà. L'aea bossà con far douc i ciavei biondins de so caro bez. Ence el vardaa fora strach. L lurier? Le strade piene de neif? Valch auter cruzie?

Piere ge vardaa col ciap pien de domane, ma aboncont l'aea la sensazion de no esser demò el te si pensieres descheche enveze l'aea volù. E canche la mama ge à dit: "Piciol, rencura via ti jeghes, cori te cambra a te meter l pigiama e dapò gei che se magnon ensema chi bogn amelec co la marmelada de garnete che à fat la giava" el l'aea responet: "Na, na, na! I amelec no me piasc, no mete via i jeghes e no me mete l pigiama. Son stuf, stuf e stuf..."

E l'aea fat l caprizious, l'aea batù i pie jabas, l'aea frignà e petà stroz le robe.

Da zeche ora la mama l l'aea tout sun brac e la l'aea portà te bagn, lavà e metù te let.

E dò aer rencurà sù te ciasadafech e aer vardà mingol la televijion col papà, entenanc pech e nia, percheche la era massa stenciada e avelida per l comportament de so picol tesor, la era jita te let, segura che na bona dormida la ge aessa endò retù l bon umor e l'entusiasm de semper. E pech dò ge era jit dò ence l papà.

Ma Piere, te so let, no l'era bon de se endromenzar. L seghitaa a se utar e l se renea cont che no l'era proprio stat n bravo bez. Fin canche, da zeche ora, l'à dezidù de levar fora per jir a meter via te scatolon duc chi jeghes stroz te stua.

Ma ruà te stua... chi troel? N belot veiat co la barba biencia che l'é dò che l ruma sù anter si jeghes.

"E tu chi este pa? Che faste pa chiò?"

"No veiste? Son Sèn Nicolò. Scouta, caro Piere, chesta sera a vègnir ju dal Lagorai, mia lesa se à rebaltà te la neif e la se à rot, e ades no sé più co far a jir da duc i picoi bec che me speta."

"E gio che posse pa far?" domana cruzià Piere.

"Veh, perdoneme tant Piere, ma gio sé che canche tu ne domane n picol don a mi o al Babinol, tu domane semper na moto. Chest me à fat pissar che tu segur tu aras n maraut de moto e ere vegnù chiò per me n emprestar una, che dapò

ben segur te daré de retorn... ma ades no son bon de troar chela che cerie..."

"Ma Sèn Nicolò, mie moto le é dute picole. Veiste, chesta l me l'à data barba Simon, chesta la é de la giava Maria, chesta la é de l'ameda Teresa, chesta me l'à regalada mie jerman Gianluca, chesta..."

"Per l picol - ge sauta ite Sèn Nicolò - no é problemes. Gio son n sènt, descheche tu sas, e posse le mudar descheche voi, ma cere n sidecar percheche se no no sé olà meter mi jeghes."

"Lé! Lé! - cigaa Piere smacian le man - ades te l'empreste. Son proprio content de poder te didar." E zacàn, cerian daperdut, en ventron jabas, l'ha troà sottie canapé.

"Detalpai, detalpai - ge dijea Sèn Nicolò, se l strenjan de cher sul piet - t'es proprio n bravo bez."

Dapò l'é jit ju per sciala, l'é se n jit sot ciasa enlongia strada de

la Veisc, l'à pojà l picol sidecar su la neif, l'à slarià i brac envers l ciel e chest se à mudà te na sgalizenta beliscima e gran moto col caret apede, olache Sèn Nicolò l'à ciareà duc i pachec e pachetins che l'era stat bon de se tor dò.

Dapò l se à tout jù la gran capa da piscop e l se à metù caschet e veiares.

L se à utà amò na outa coi eies

grignolenc envers la fenestra de ciasa, da olache Piere l'era dò che l ge manaa n picol bos co la man e l lo à saludà con gregn moc di brac.

Dapò l'é pontà demez de bala, percheche l'era mingol tardif e l cognea amò jir deretorn sul Lagorai a tor i autres dons.

Mariateresa Fanton Crepez



www.artcanis.it